

四庫全書

史部

欽定四庫全書

元史卷三

明翰林學士亞中大夫知制誥兼修國史宋濂等修

本紀第三

憲宗

憲宗桓肅皇帝諱莽賚扣睿宗圖類長子也母曰莊獻
太后奇味氏諱縹勒噶塔納歲戊辰十二月三日生帝
時鴻和岱部知天象者言帝後必大貴故以莽賚扣為

名

莽齊扣華言長子也

太宗在潛邸養以為子屬昂輝皇后撫育

之既長為娶果囉囉部女呼爾察為妃分之部民及睿宗薨乃命歸藩邸從征伐屢立奇功嘗攻欽察部其酋巴齊瑪克逃于海島帝聞亟進師至其地適大風刮海水去其淺可渡帝喜曰此天開道與我也遂進屠其衆擒巴齊瑪克命之跪巴齊瑪克曰我為一國主豈苟求生且身非駝何以跪人為乃囚之巴齊瑪克謂守者曰我竄入于海與魚何異然終見擒天也今水且迴軍宜

早還帝聞之即班師而水已至後軍有浮渡者復與諸王巴圖征俄羅斯部至額里齊城躬自搏戰破之歲戊申定宗崩朝廷久未立君中外恟恟咸屬意於帝而覲覲者衆議未決諸王巴圖穆格額埒布格綏克托台奇爾大將烏蘭哈達薩納台特們德爾伊蘇布哈咸會于阿爾圖和賚之地巴圖首建議推戴時定宗皇后烏拉海額實所遣使者巴拉在坐曰昔太宗命以皇孫寶勒們為嗣諸王百官皆與聞之今寶勒們故在而議欲他

屬將寘之何地耶穆格曰太宗有命誰敢違之然前議立定宗由皇后托里格呼勒與汝輩為之是則違太宗之命者汝等也尚誰咎耶巴拉語塞烏蘭哈達曰莽賚扣聰明睿知人咸知之巴圖議良是巴圖即申令於衆衆悉應之議遂定

元年辛亥夏六月西方諸王伯爾克托海特穆爾東方諸王伊克托歡伊遜克阿齊台塔齊爾伯勒格台西方諸大將巴哩齊等東方諸大將伊蘇布哈等復大會于

奎騰敖拉之地共推帝即皇帝位於鄂諾河實勒們及諸弟諾果等心不能平有後言帝遣諸王實喇與孟克薩勒帥兵覘之諸王伊蒙克布琳哈扎爾等皆後期不至遣布琳齊達率兵備之遂改更庶政命皇弟呼必賚領治蒙古漢地民戶遣塔爾鄂勒博察球爾賽音諤德齊趙壁等詣燕京撫諭軍民以孟克薩勒為斷事官以博勒和掌宣發號令朝覲貢獻及內外聞奏諸事以鴻和爾留守和琳宮闕帑藏阿勒達爾副之以伊囉幹齊

布扎爾鄂勒博都特達喇等充燕京等處行尚書省事
賽音諤德齊鼐智密鼎佐之以諾海塔喇海巴蘇呼等
充巴實伯里等處行尚書省事溫都爾烏遜阿哈瑪特
伊德實佐之以諤爾根充阿穆河等處行尚書省事帕
哈哩鼎鼎智密鼎佐之以察罕伊爾根統兩淮等處蒙
古漢軍以丹達爾統四川等處蒙古漢軍以和爾台統
土蕃等處蒙古漢軍皆仍前征進以僧海雲掌釋教事
以道士李真常掌道教事約蘇圖阿齊台昌吉卓諾哈

達奇凌阿勒楚爾及網阿塔阿薩爾和塔拉等坐誘諸王為亂竝伏誅頒便益事宜於國中凡朝廷及諸王濫發牌印詔旨宣命盡收之諸王馳驛許乘三馬遠行亦不過四諸王不得擅招民戶諸官屬不得以朝覲為名賦歛民財民糧遠輸者許於近倉輸之罷築和琳城役千五百人冬以揚珠濟達違命遣哈坦誅之仍籍其家二年壬子春正月幸實桂地遣奇塔特布哈攻莽賚伊勒都齊寨皇太后崩夏駐蹕和琳分遷諸王於各所格

丹於巴實伯里地默呼於雅爾達實河海都於哈里雅
爾地伯爾克於庫爾哲地托克托於額密埒地孟格圖
及太宗皇后克勒奇庫塔納於奎騰所居地之西仍以
太宗后妃家貲分賜親王定宗后及實勒們母以厭穰
事覺竝賜死謫實勒們伊蘇布琳等於摩多齊之地禁
錮呼齊納和斯圖等於軍營秋七月命呼必賚征大理
諸王托羅該薩奇勒征身毒奇塔特布哈征瑪拉希寶
喇征西域蘇勒坦諸國詔諭宋荆南襄陽樊城均州諸

守將使來附八月呼必賚次臨洮命總帥汪特格以城
利州聞欲為取蜀計冬十月命諸王伊克征高麗駐蹕
諤特古呼蘭地時因獵墮馬傷臂不視朝百餘日十二
月戊午大赦以特爾格奇庫庫楚等掌帑藏布琳哈喇
烏遜掌鄂拓克阿固察掌祭祀醫巫卜筮阿拉克布哈
副之諸王哈喇費以珠爾噶岱掌傳驛所需博勒和掌
筆且齊寫發宣詔及諸色目官職徙諸匠五百戶修行
宮是歲籍漢地民戶諸王實喇費

三年癸丑春正月汪特格修治利州且屯田蜀人莫敢
侵軼帝獵于齊齊克察罕地諸王伊克以怨襲諸王塔
拉爾營帝遂會諸王于鄂諾河北賜予甚厚罷伊克征
高麗兵以扎拉台為征東元帥遣必齊克伯爾克拈俄
羅斯戶口三月大兵攻海州戍將王國昌逆戰于城下
敗之獲都統一人夏六月命諸王錫里庫及烏蘭哈達
等帥師征西域法勒哈巴哈台等國又命多托爾台薩
里圖爾哈等征痕都斯坦克實密爾等國辛和哩呼納

顏布哈地諸王巴圖遣托卜齊雅詣行在乞買珠銀萬錠以千錠授之仍詔諭之曰太祖太宗之財若此費用何以給諸王之賜王宜詳審之此銀就充今後歲賜之數秋幸準諾爾以孟克薩勒為萬戶哈坦為扎爾古齊九月呼必賚次塔拉地分兵三道以進冬十二月大理平駐蹕昂吉地命宗王雅勒呼與洪福源同領軍征高麗攻拔禾山東州春州三角山楊根天龍等城是歲斷事官孟克薩勒卒

四年甲寅春帝獵于齊齊克察罕夏幸伊爾默克之地
遣扎拉爾部和爾齊征高麗秋七月詔官吏之赴朝
理算錢糧者許自首不公仍禁以後浮費冬大獵于額
默克沁哈爾察該地呼必賚還自大理留烏蘭哈達攻
諸夷之未附者入覲於獵所是歲會諸王于庫庫諾爾
之西乃祭天于日月山初籍新軍帝謂大臣求可以慎
固封守閑於將略者擢史樞征行萬戶配以真定相衛
懷孟諸軍駐唐鄧張柔移鎮亳州權萬戶史權屯鄧州

張柔遣張信將八漢軍戍潁州王安國將四千戶渡漢南深入而還張柔以連歲勤兵兩淮艱於糧運奏據亳之利詔柔率山前八軍城而戍之柔又以渦水北隘淺不可舟軍既病涉曹濮魏博粟皆不至乃築甬路自亳抵汴堤百二十里流深而不能築復為橋十五或廣八十尺橫以二堡戍之均州總管孫嗣遣人齎蠟書降且乞援史權以精甲備宋人之要遂援嗣而來其後驍將鍾顯王梅杜柔束師信各帥所部來降

五年乙卯春詔徵逋欠錢穀夏帝幸伊爾默克圖秋九月張柔會大帥干符離以百丈口為宋往來之道可容萬艘遂築甬路自亳而南六十餘里中為橫江堡又以路東六十里皆水可致宋舟乃立柵水中惟密置偵邏於所達之路由是鹿邑寧陵考柘楚丘南頓無宋患陳蔡賴息皆通矣是歲改命扎拉台與洪福源同征高麗後此又連三歲攻拔其光州安城中州元鳳珍原甲向玉果等城

六年丙辰春大風起北方砂礫飛揚白日晦冥帝會諸王百官于諤爾伯勒格圖地設宴六十餘日賜金帛有差仍定擬諸王歲賜錢穀呼必賚遣默爾合齊詣行在所奏請續簽內郡漢軍從之夏四月駐蹕于塔密爾五月辛寅喇鄂爾多六月太白晝見幸岱爾哈達地諸王伊遜克駙馬約索爾等請伐宋帝亦以宋人違命因使會議伐之秋七月命諸王各還所部以居諸王塔齊爾駙馬特爾格軍過東平諸處掠民羊豕帝聞遣使問罪

由是諸軍無犯者是歲高麗國王細嗟甫雲南酋長摩
合羅嗟及蘇勒坦諸國來覲烏蘭哈達討白蠻等克之
遂自寶巴爾還至重慶府敗宋將張都統賜金縷織文
衣一襲銀五十兩綵帛萬二百匹以賚軍士冬駐蹕阿
多固塔齊兒愛滿以阿穆河回回降民分賜諸王百官
七年丁巳春幸呼蘭伊勒吉詔諸王出師征宋奇塔特
布哈等討平莽賚伊勒都齊寨夏六月謁太祖行宮祭
旗鼓復會于吉魯爾之地還幸伊爾默克圖秋駐蹕準

諾爾驪馬乳祭天九月出師南征以駙馬琳沁之子奇塔特為達魯噶齊鎮守俄羅斯仍賜馬三百羊五千回鶻獻水精盆珍珠傘等物可直銀三萬餘錠帝曰方今百姓疲弊所急者錢爾朕獨有此何為却之賽音諤德齊以為言帝稍償其直且禁勿復有獻宗王塔齊爾率諸軍南征圍樊城霖雨連月乃班師元帥布琳濟達軍自鄧州略地遂渡漢江冬十一月烏蘭哈達伐交趾敗之入其國安南主陳日熉竄海島遂班師遣阿勒達爾

托音囊嘉特等詣陝西等處理算錢穀大駕度漠南至
於玉隴棧呼必賚及諸王額呼布格巴爾圖楚木哈喇
裕隆哈實錫里濟公主塔瑪噶等來迎大燕既而各遣
歸所部

八年戊午春正月朔辛阿爾班托輝之地受朝賀二月
陳日昃傳國于長子光曷光曷遣壻與其國人以方物
來見烏蘭哈達送詣行在所諸王錫里庫討回回法勒
哈平之禽其王遣使來獻捷帝獵于伊埒哈雅之地師

南征次于河適冰合以土覆之而渡帝自將伐宋由西
蜀以入命張柔從呼必賚征鄂趨杭州命塔察攻荆山
分宋兵力宋四川制置使蒲澤之攻成都耨埒率師與
戰敗之進攻雲頂山守將姚某等以衆相繼來降詔以
耨埒為都元帥帝由東勝河渡遣叅知政事劉太平括
興元戶口三月命洪察球爾率師從扎拉台征高麗夏
四月駐蹕六盤山諸郡縣守令來覲豐州千戶郭燧奏
請續簽軍千人修治金州從之時軍四萬號十萬分三

道而進帝由隴州入散關諸王默格由祥州入米倉關
布爾察克萬戶由漁關入沔州以明安岱爾為太傅守
京兆詔徵益都行省李璫兵璫來言益都南北要衝兵
不可撤從之璫還擊海州漣水等處五月皇子阿寶達
因獵獨騎傷民稼帝見讓之遂撻近侍數人士卒有拔
民葱者即斬以徇由是秋毫莫敢犯仍賜所經郡守各
有差秋七月留輜重於六盤山率兵由寶鷄攻重貴山
所至輒平八月辛丑璫與宋人戰殺宋師殆盡九月駐

蹕漢中都元帥耨埒留密喇卜和卓劉哈瑪爾等守成
都率餘兵渡馬湖禽宋制置使張實遣實招諭苦竹隘
實遁冬十月壬午帝次寶峯癸未如利州觀其城池竝
非深固以汪特格能守蜀不敢犯賜卮酒獎諭之帝渡
嘉陵江至白水江命特格造浮梁以濟梁成賜特格等
金帛有差帝駐蹕劔門戊子攻苦竹隘裨將趙仲竊獻
東南門師入與其守將楊立戰敗之殺立衆皆奔潰詔
母犯趙仲家屬仍賜仲衣帽徙于隆慶己亥獲張實支

解之賜特格玉帶及犒賞士卒留精兵五百守之遣使招諭龍州帝至高峯庚子圍長寧山守將王佐裨將徐昕等率兵出戰敗之十一月己酉帝督軍先攻鵝頂堡壬子力戰于望喜門薄暮宋知縣王仲由鵝頂堡出降是夜破其城王佐死焉癸丑誅佐之子及徐昕等四十餘人以彭天祥為達魯噶齊治其事王仲副之丙辰攻大獲山守將楊大淵降命大淵為四川侍郎仍以其兵從庚午次和溪口遣驍騎畧青居山是月龍州王知府

降諸王孟格圖攻禮義山不克諸王塔齊爾略地至江而還竝會于行在所命呼必賚統諸路蒙古漢軍伐宋十二月壬午楊大淵率所部兵與汪特格分擊相等縣都元帥耨埒攻簡州以宋降將張威率衆為先鋒乙酉帝次于運山大淵遣人招降其守將張大悅仍以大悅為元帥師至青居山裨將劉淵等殺都統段元鑒降庚寅遣使招諭未附丁酉隆州守將降己亥大良山守將蒲元圭降詔諸軍毋俘掠癸卯攻雅州拔之石泉守

將趙順降甲辰遣宋人晉國寶招諭合州守將王堅堅辭之國寶遂歸是歲皇子璫都薨于吉河之南

九年己未春正月乙巳朔駐蹕重貴山北置酒大會因問諸王駙馬百官曰今在宋境夏暑且至汝等其謂可居否乎扎拉爾部人托歡進曰南土瘴癘上宜北還所獲人民委吏治之便阿爾拉部人巴里齊曰托歡怯臣願往居焉帝善之戊申晉國寶歸次峽口王堅追還殺之諸王孟格圖復攻渠州禮義山伊爾圖魯雄攻巴州

平梁山丁卯大淵請攻合州俘男女八萬餘二月丙子
帝悉率諸兵渡鷄爪灘至石子山丁丑督諸軍戰城下
辛巳攻一字城癸未攻鎮西門三月攻東新門奇勝門
鎮西門小堡夏四月丙子大雷雨凡二十日乙未攻護
國門丁酉夜登外城殺宋兵甚衆五月屢攻不克六月
丁巳汪特格復選兵夜登外城馬軍寨殺寨主及守城
者王堅率兵來戰遲明遇雨梯折後軍不克進而止是
月帝不豫秋七月辛亥留精兵三千守之餘悉攻重慶

癸亥帝崩于釣魚山壽五十有二在位九年追諡桓肅
皇帝廟號憲宗帝剛明雄毅沉斷而寡言不樂燕飲不
好侈靡雖后妃不許之過制初太宗朝羣臣擅權政出
多門至是凡有詔旨帝必親起草更易數四然後行之
御羣臣甚嚴嘗諭旨曰爾輩若得朕獎諭之言即志氣
驕逸志氣驕逸而災禍有不隨至者乎爾輩其戒之性
喜畋獵自謂遵祖宗之法不蹈襲他國所為然酷信巫
覡卜筮之術凡行事必謹叩之殆無虛日終不自厭也

元史卷三

元史卷三考證

征俄羅斯部 原文作幹羅思部他卷又作阿羅思兀

魯思今併改

至額里齊城 原文作也烈贊城他卷又作也里替今

併改

定宗皇后烏拉海額實 按后妃表傳本名幹兀立海

迷失此刪省幹兀立但稱海迷失於音譯未合今以

全名改對

由皇后托里格呼勒

原文作脫忽列乃考后妃表傳

又作脫列哥那今併改

元年遣布琳濟達率兵備之

原文作不憐吉斛他卷

又作卜隣吉斛今併改

二年以珠爾噶忒掌傳驛所需

原文作只兒幹帶他

卷又作只里瓦斛只里幹台今併改

三年以扎拉台為征東元帥

原文作扎剌兒帶卷後

又作劄剌斛今併改

征痕都斯坦 原文作欣都思他卷又作遜都思又但
作忻都今併改

七年囊嘉特等 原文作囊加台他卷又作南家帶今
併改

冬帝度漠南 按上文既書冬十一月此複書冬字當
是十二月之訛但考續綱目宋元通鑑俱不載此事
無憑訂正仍闕疑

八年進攻大獲山 原文作長獲山據續綱目及宋元

通鑑改

守將楊大淵降 原文祇稱大淵此係初見史例當具

姓名今增

六月丁巳 以上文正月乙巳朔推之六月內不當有
丁巳今闕疑

欽定四庫全書

元史卷四

明翰林學士亞中大夫知制誥兼修國史宋濂等修

本紀第四

世祖一

世祖聖德神功文武皇帝諱呼必賚睿宗皇帝第四子
母莊聖太后奇味氏以乙亥歲八月乙卯生及長仁明
英睿事太后至孝尤善撫下納鴻吉哩氏為妃歲甲辰

帝在潛邸思大有為於天下延藩府舊臣及四方文學之士問以治道歲辛亥六月憲宗即位同母弟惟帝最長且賢故憲宗盡屬以漠南漢地軍國庶事遂南駐扎固圖之地邢州有兩達爾罕言於帝曰邢吾分地也受封之初民萬餘戶今日減月削纔五七百戶耳宜選良吏撫循之帝從其言承制以托克托及張耕為邢州安撫使劉肅為商榷使邢乃大治歲壬子帝駐桓撫間憲宗令斷事官伊囉斡齊與布扎爾等總天下財賦于燕

視事一日殺二十八人其一人盜馬者杖而釋之矣偶有獻環刀者遂追還所杖者手試刀斬之帝責之曰凡死罪必詳讞而後行刑令一日殺二十八人必多非辜既杖復斬此何刑也布扎爾錯愕不能對太宗朝立軍儲所于新衛以收山東河北丁糧後惟計直取銀帛軍行則以資之帝請于憲宗設官築五倉于河上始令民入粟宋遣兵攻號之盧氏河南之永寧衛之八柳渡帝言之憲宗立經畧司於汴以莽格史天澤楊惟中趙壁

為使陳紀楊果為叅議俾屯田唐鄧等州授之兵牛敵
至則禦敵去則耕仍置屯田萬戶於鄧完城以備之夏
入覲憲宗于察遜諾爾之地奉命帥師征雲南秋
七月丙午禍牙西行歲癸丑受京兆分地諸將皆築第
京兆豪侈相尚帝即分遣使戍興元諸州又奏割河東
解州鹽池以供軍食立從宜府于京兆屯田鳳翔募民
受鹽入粟轉漕嘉陵夏遣王府尚書姚樞立京兆宣撫
司以布琳及楊惟中為使闡隴大治又立交鈔提舉司

印鈔以佐經用秋八月師次臨洮遣伊拉珠王君侯王
鑑諭大理不果行九月壬寅師次塔拉分三道以進大
將烏蘭哈達率西道兵由晏當路諸王察罕伊朶爾師
東道兵由白蠻帝由中道乙巳至滿陀城留輜重冬十
月丙午過大渡河又經行山谷二千餘里至金沙江乘
草囊及筏以渡摩安蠻王迎降其地在大理北四百餘
里十一月辛卯復遣伊拉珠等使大理丁酉師至白蠻
打郭寨其主將出降其姪堅壁拒守攻拔殺之不及其

民庚子次三旬辛丑白蠻送款十二月丙辰軍薄大理
城初大理主段氏微弱國事皆決於高祥高和兄弟是
夜祥率衆遁去命大將伊克及巴圖爾追之帝既入大
理曰城破而我使不出計必死矣己未西道兵亦至命
姚樞等搜訪圖籍乃得三使尸既瘞命樞為文祭之辛
酉南出龍首城次趙賧癸亥獲高祥斬于姚州留大將
烏蘭哈達戍守以劉時中為宣撫使與段氏同安輯大
理遂班師歲甲寅夏五月庚子駐六盤山六月以廉希

憲為西關道宣撫使姚樞為勸農使秋八月至自大理
駐桓撫間復立撫州冬駐扎固圖之地歲乙卯春復駐
桓撫間冬駐奉聖州北歲丙辰春三月命僧子聰卜地
于桓州東灤水北城開平府經營宮室冬駐于哈喇巴
勒噶遜之地憲宗命益懷州為分地歲丁巳春憲宗命
阿勒達爾劉太平會計京兆河南財賦大加鈎考其貧
不能輸者帝為代償之冬十二月入覲于伊克德呼蘇
之地議分道攻宋以明年為期歲戊午冬十一月戊申

禡牙于開平東北是日啓行歲己未春二月會諸王于
邢州夏五月駐小濮州徵東平宋子貞李昶訪問得失
秋七月甲寅次汝南命大將巴圖爾等前行備糧漢上
戒諸將毋妄殺命楊惟中郝經宣撫江淮筆且齊孫貞
督軍須蔡州有軍士犯法者貞縛致有司白于帝命戮
以徇諸軍凜然無敢犯令者八月丙戌渡淮辛卯入大
勝關宋戍兵皆遁壬辰次黃陂甲午遣廉希憲招臺山
寨比至千戶董文炳等已破之時淮民被俘者衆悉縱

之庚子先鋒察呼得宋沿江制置司榜來上有云今夏
謀者聞北兵會議取黃陂民船繫棧由陽邏堡以渡會
于鄂州帝曰此事前所未有願如其言辛丑師次江北
九月壬寅朔親王穆格自合州釣魚山遣使以憲宗凶
問來告且請北歸以繫天下之望帝曰吾奉命南來豈
可無功遽還甲辰登香鑪山俯瞰大江江北曰武湖湖
之東曰陽邏堡其南岸即潁黃洲宋以大舟扼江渡帝
遣兵奪二大舟是夜遣瑪拉噶齊張文謙等具舟楫乙

已遲明至江岸風雨晦冥諸將皆以為未可渡帝不從
遂申敕將帥揚旗鼓伐鼓三道並進天為開霽與宋師接
戰者三殺獲甚衆逕達南岸軍士有擅入民家者以軍
法從事且所俘獲悉縱之丁未遣王冲道李宗傑訾郊
招諭鄂城比至東門矢下如雨冲道墜馬為敵所獲宗
傑郊奔還帝駐潯黃洲己酉抵鄂屯兵教塲庾戌圍鄂
壬子登城東北壓雲亭立望樓高可五大望見城中出
兵趣兵迎擊生擒二人云賈似道率兵救鄂事起倉卒

皆非精銳遂命官取逃民棄糧聚之軍中為攻取計戊午順天萬戶張柔兵至大將巴圖爾等以舟師趣岳州遇宋將呂文德自重慶來巴圖爾等迎戰文德乘夜入鄂城守愈堅冬十月辛未朔移駐烏龜山甲戌巴圖爾還自岳十一月丙辰移駐牛頭山烏蘭哈達畧地諸蠻由交趾歷邕桂抵潭州聞帝在鄂遣使來告時先朝諸臣阿勒達爾琿塔噶托果斯托里齊等謀立額呼布格額呼布格者睿宗第七子帝之弟也於是阿勒達爾發

兵於漠北諸部托里齊括兵於漠南諸州而阿勒達爾
乘傳調兵去開平僅百餘里皇后聞之使人謂之曰發
兵大事太祖皇帝曾孫珍戩在此何故不令知之阿勒
達爾不能荅繼又聞托里齊亦至燕后即遣托歡額默
根馳至軍前密報請速還丁卯發牛頭山聲言趣臨安
留大將巴圖爾等帥諸軍圍鄂閏月庚午朔還駐青山
磯辛未臨江岸遣張文謙還諭諸將曰遲六日當去鄂
退保薊黃洲命文謙發降民二萬北歸宋賈似道遣宋

京請和命趙璧等語之曰汝以生靈之故來請和好其
意甚善然我奉命南征豈能中止果有事大之心當請
於朝是日大軍北還己丑至燕托里齊方括民兵民甚
苦之帝詰其由托以憲宗臨終之命帝察其包藏禍心
所集兵皆縱之人心大悅是冬駐燕京近郊

中統元年春三月戊辰朔車駕至開平親王哈坦阿濟
格率西道諸王塔齊爾額森克呼魯古爾卓多率東道
諸王皆來會與諸大臣勸進帝三讓諸王大臣固請辛

卯即皇帝位以瑪穆特趙璧董文炳為燕京路宣慰使
陝西宣撫使廉希憲言高麗國王嘗遣其世子俱入覲
會憲宗將兵攻宋俱留三年不遣今聞其父已死若立
俱遣歸國彼心懷德於我是不煩兵而得一國也帝是
其言改館俱以兵衛送之仍赦其境內夏四月戊戌朔
立中書省以王文統為平章政事張文謙為左丞以巴
崇廉希憲商挺為陝西四川等路宣撫使趙良弼參議
司事鈕祜祿納罕張啓元為西京等處宣撫使己亥詔

諭高麗國王俎仍歸所俘民及其逃戶禁邊將勿擅掠
辛丑以即位詔天下詔曰朕惟祖宗肇造區宇奄有四
方武功迭興文治多缺五十餘年於此矣蓋時有先後
事有緩急天下大業非一聖一朝所能兼備也先皇帝
即位之初風飛雷厲將大有為憂國愛民之心雖切於
已尊賢使能之道未得其人方董夔門之師遽遺鼎湖
之泣豈期遺恨竟勿克終肆予冲人渡江之後蓋將深
入焉乃聞國中重以僉軍之擾黎民驚駭若不能一朝

居者予為此懼驛騎馳歸目前之急雖紓境外之兵未
戢乃會羣議以集良規不意宗盟輒先推戴左右萬里
名王巨臣不召而來者有之不謀而同者皆是咸謂國
家之大統不可以曠神人之重寄不可暫虛求之今日
太祖嫡孫之中先皇母弟之列以賢以長止予一人雖
在征伐之間每存仁愛之念博施濟衆實可為天下主
天道助順人謨與能祖訓傳國大典於是乎在孰敢不
從朕峻辭固讓至於再三祈懇益堅誓以死請於是俯

徇輿情勉登大寶自惟寡昧屬時多艱若涉淵冰罔知
攸濟爰當臨御之始宜新弘遠之規祖述變通正在今
日務施實德不尚虛文雖承平未易遽臻而饑渴所當
先務嗚呼厯數攸歸欽應上天之命勲親斯託敢忘烈
祖之規體極建元與民更始朕所不逮更賴我遠近宗
族中外文武同心協力獻可替否之助也誕告多方體
予至意丁未以翰林侍讀學士郝經為國信使翰林待
制何源禮部郎中劉人傑副之使于宋丙辰收輯中外

官吏宣劄牌面遣特穆爾李舜欽等行部考課各路諸色工匠置急遞鋪乙丑徵諸道兵六千五百人赴京師宿衛置互市于漣水軍禁私商不得越境犯者死額呼布格僭號于和琳城西阿勒坦河召賈居貞張儼王煥完顏愈乘傳赴闕五月戊辰朔詔雅克特穆爾孟古岱節度黃河以西諸軍丙戌建元中統詔曰祖宗以神武定四方淳德御羣下朝廷草創未遑潤色之文政事變通漸有綱維之目朕獲續舊服載擴丕圖稽列聖之洪

規講前代之定制建元表歲示人君萬世之傳紀時書
王見天下一家之義法春秋之正始體大易之乾元炳
煥皇猷權輿治道可自庚申年五月十九日建元為中
統元年惟即位體元之始必立經陳紀為先故內立都
省以總宏綱外設總司以平庶政仍以興利除害之事
補偏救弊之方隨詔以頒於戲秉籙握樞必因時而建
號施仁發政期與物以更新敷宣懷惻之辭表著憂勞
之意凡在臣庶體予至懷詔安撫壽春府軍民甲午以

額呼布格反詔赦天下乙未立十路宣撫司以賽音諤
德齊李德輝為燕京路宣撫使徐世隆副之宋子貞為
益都濟南路宣撫使王磐副之河南路經畧使史天澤
為河南宣撫使楊果為北京路宣撫使趙炳副之張德
輝為平陽太原路宣撫使謝瑄副之博囉哈雅劉肅並
為真定路宣撫使姚樞為東平路宣撫使張肅副之中
書左丞張文謙為大名彰德路宣撫使游顯副之鈕祐
祿納罕為西京路宣撫使崔巨濟副之廉希憲為京兆

等路宣撫使以汪惟正為鞏昌等處便宜都總帥呼哩雅濟為鞏昌路元帥詔諭成都路侍郎張威安撫元忠綿資邛彭等州西川潼川隆慶順慶等府及各處山砦歸附官吏給宣命金符有差詔平陽京兆兩路宣撫司僉兵七千人於延安等處守隘以萬戶鄭鼎實喇孟古岱領之貧不能應役者官為資給徵諸路兵三萬駐燕京近地命諸路市馬萬匹送開平府以總帥汪良臣統陝西漢軍於沿河守隘立望雲驛非軍事毋得輒入煢

惑入南斗留五十餘日六月戊戌詔燕京西京北京三路宣撫司運米十萬石輸開平府及撫州沙井靖州魚兒樂以備軍儲以李璫為江淮大都督劉太平等謀反伏誅并誅奇爾岱布哈於東川察喇卜和卓於西川瑄塔噶反乙巳李璫言獲宋諜者言賈似道調兵聲言攻漣州遣人覘之見許浦江口及射陽湖兵船二千艘宜繕理城塹以備罷阿勒達爾所簽解鹽戶軍百人壬子詔陝西四川宣撫司已崇節制諸軍乙卯詔東平路萬

戶嚴忠濟等發精兵一萬五千人赴開平乙丑以石藏布為大理國總管佩虎符詔十路宣撫司造戰襖裘帽各以萬計輸開平是月召真定劉郁邢州郝子明彰德胡祇通燕京馮渭王光益楊恕李彥通趙和之東平韓文獻張昉等乘傳赴闕高麗國王王僊遣其子永安公億判司宰事韓即來賀即位以國王封冊王印及虎符賜之秋七月戊辰勅燕京北京西京真定平陽大名東平益都等路宣撫司造羊裘皮帽袴靴皆以萬計輸開

平己巳以萬戶史天澤扈從先帝有功賜銀萬五千兩
遣靈州種田民還京兆庚午賜山東行省大都督李璡
金符二十銀符五給所部有功將士癸酉以燕京路宣
慰使瑪穆特行中書省事燕京路宣慰使趙璧平章政
事張啓元叅知政事王鶚翰林學士承旨兼修國史河
南路宣撫使史天澤兼江淮諸翼軍馬經畧使丙子詔
中書省給諸王塔齊爾益都平州封邑歲賦金帛并以
諸王布呼實勒們所屬民戶人匠歲賦給之詔造中統

元寶交鈔立互市于潁州漣水光化軍北京路都元帥
阿哈乞免所部軍士征徭從之宋兵攻邊城詔遣太尹
奇味孟古岱率所部合兵擊之下詔褒賞行省大都督
李璫帝自將討額呼布格勅劉天麟規措中都析津驛
傳馬八月丙午授中書左丞行大名等路宣撫使張大
謙虎符丁未詔都元帥樛埒所過毋擅捶掠官吏己酉
立秦蜀行中書省以京兆等路宣撫使廉希憲為中書
省右丞行省事宋兵臨漣州李璫乞諸道援兵癸丑賜

筆且齊塔爾琿銀二千五百兩李璫乞遣將益兵渡淮
攻宋以方遣使修好不從癸亥澤州潞州旱民饑勅賑
之九月丁卯帝在準特爾格之地以額呼布格逆命下
詔諭中外乙亥李璫復請攻宋復諭止之壬午初置拱
衛儀仗是月阿勒達爾率兵至西涼府與琿塔噶軍合
詔諸王哈坦哈必齊與總帥汪良臣等率師討之丙戌
大敗其軍于姑臧斬阿勒達爾及琿塔噶西土悉平冬
十月丁未李璫言宋兵復軍于連州癸丑初行中統寶

鈔戊午車駕駐錫衮之地命給官錢雇在京橐駝運米
萬石輸行在所十一月戊子發常平倉賑益都濟南濱
棣饑民十二月丙申以禮部郎中孟甲禮部員外郎李
文俊使安南大理乙巳李璫上將士功命璫以益都官
銀賞之帝至自和琳駐畢燕京近郊始制祭享太廟祭
器法服以梵僧帕克斯巴為帝師授以玉印統釋教立
仙音院後改為玉宸院括樂工立儀鳳司又立符寶局
及御酒庫羣牧所升衛輝為總管府賜親王穆格銀二

千五百兩諸王阿齊台呼魯古爾哈坦呼喇珠星納噶
爾銀各五千兩文綺帛各三百匹金素半之諸王塔察
阿穆爾鈔各五十九錠有奇綿五千九十八斤絹五千
九十八匹文綺三百匹金素半之海都銀八百三十三
兩文綺五十匹金素半之多爾濟額布根銀八百五十
兩鄂爾和達銀五千兩文綺三百匹金素半之哲伯特
穆爾銀八百三十三兩兆圖卜穆爾銀五千兩文綺三
百匹金素半之道哩雅呼銀八百三十三兩特賜綿五

十斤阿濟格銀五千兩文綺三百金素半之先朝皇后
圖古哩克銀二千五百兩羅絨等折寶鈔二十三錠有
奇皇后安濟蘇銀二千五百兩烏爾古納妃子銀五千
兩自是歲以為常

二年春正月辛未夜東北赤氣照人大如席乙酉宋兵
圍漣州己丑李璫率將士迎戰敗之賜詔獎諭給金銀
符以賞將士庚寅璫擅發兵修益都城塹二月丁未太
陰掩昴己亥宋兵攻漣水命阿珠等帥兵赴之丙午車

駕幸開平詔減免民間差發罷守隘諸軍秦蜀行省借
民錢給軍以今年稅賦償之免平陽太原軍站戶重科
租稅丁未詔行中書省平章瑪穆特及王文統等率各
路宣撫使赴闕丁巳李璫敗宋于沙湖堰三月壬戌朔
日有食之夏四月丙午詔軍中所俘儒士聽贖為民辛
亥遣弓工往教鄆闡人為弓乙卯詔十路宣撫使量免
民間課程命宣撫司官勸農桑抑游惰禮高年問民疾
苦舉文學才識可以從政及茂才異等列名上聞以聽

擢用其職官污濫及民不孝悌者量輕重議罰辛酉詔太康弩軍二千八百人戍蔡州以禮部郎中劉芳使大理等國五月乙丑禁使臣毋入民家令止頓析津驛遣崔明道李全義為詳問官詣宋淮東制司訪問國信使郝經等所在仍以稽留信使侵擾疆場詰之庚辰勅使臣及軍士所過城邑官給廩餼毋擾于民丁亥申嚴沿邊軍民越境私商之禁唐慶子政臣入見詔復其家弛諸路山澤之禁禁私殺馬牛申嚴越境私商販馬匹者

罪死以河南經畧宣撫使史天澤為中書右丞相河南軍民並聽節制詔成都路置惠民藥局遣王祐於西州等路採訪醫儒僧道六月癸巳括漏籍老幼等戶協濟編戶賦稅丙申賜新附人王顯忠王誼等衣物有差李璫遣人獻漣水捷罷諸路拘收布疋齊禁諸王擅遣使招民及徵私錢戊戌太陰犯角詔諭十路宣撫司并管民官定鹽酒稅課等法癸卯以嚴忠範為東平路行軍萬戶兼管民總管仍諭東平路達魯噶齊等官並聽節

制詔定中外官所乘馬數各有差乙巳賑和索哩驛戶
之乏食者賞奇徹所部將校有功者銀二千五百兩及
幣帛有差己酉命竇默仍翰林侍讀學士默與王鶚面
論王文統不宜在相位薦許衡代之帝不憚而罷辛亥
轉懿州米萬石賑親王塔齊爾所部饑民賜親王哈坦
所部軍幣帛九百匹布千九百匹乙卯勅平陽路安邑
縣蒲萄酒自今毋貢詔宣聖廟及管内書院有司歲時
致祭月朔釋奠禁諸官員使臣軍馬毋得侵擾褻瀆違

者加罪丙辰以汪良臣同簽葦昌路便宜都總帥凡軍民官並聽良臣節制丁巳敕諸路造人馬甲及鐵裝具萬二千輸開平戊午詔毋收衛輝懷孟賦稅以償其所借芻粟庚申宋瀘州安撫使劉整舉城降以整行夔府路中書省兼安撫使佩虎符仍諭都元帥耨埒等使存恤其民賜故金翰林修撰魏璠諡靖肅秦蜀行省言青居山都元帥竒徹等所部將校有功詔降虎符一金符五銀符五十七令行省銓定職名給之城臨洮陞真定

鼓城縣為晉州以鼓城安平武強饒陽隸焉賜僧子聰
懷孟邢州田各五十頃罷金銀銅鐵丹粉錫碌坑冶所
役民夫及河南舞陽薑戶藤花戶還之州縣賜大理國
主段實虎符優詔撫諭之命李瓊領益都路鹽課出工
局繡女聽其婚嫁懷孟廣濟渠提舉王允中大使楊端
仁鑿沁河渠成溉田四百六十餘所高麗國王俱更名
植遣其世子慤奉表來朝命宿衛將軍布爾察克禮部
郎中高逸民持詔往諭以玉帶賜之以布哈為中書右

丞相耶律鑄為中書左丞相張啓元為中書右丞授管
領崇慶府黎雅威茂邛灌七處軍民小太尉虎符秋七
月辛酉朔始立軍儲都轉運使司以摩和納為使周錯
為副使癸亥初立翰林國史院王鶚請修遼金二史又
言唐太宗置弘文館宋太宗設內外學士院今宜除拜
學士院官作養人才乞以右丞相史天澤監修國史左
丞相耶律鑄平章政事王文統監修遼金史仍採訪遺
事並從之賑和琳饑民賞鞏昌路總帥汪惟正將校斬

琿塔噶功銀二千五百兩馬價銀四千九百兩諸王昌
通招河南漏籍戶五百命付之有司命總管王青製神
臂弓拄子弓諭河南管軍官於近城地量存牧場餘聽
民耕巴勒達爾乞於高麗鴨綠江西立互市從之乙丑
遣使持香幣祀嶽瀆丁丑渡江新附民留屯蔡州者徙
居懷孟貸其種食以萬嘉努為安撫高麗軍民達魯噶
齊賜虎符庚辰西京宣德隕霜殺稼辛巳詔許衡即其
家教懷孟生徒命西京宣撫司造船備西夏漕運壬午

遣尼雅斯拉鼎孟甲等使安南乙酉以牛驛雨雪道途
泥濘改立水驛己丑命鍊師王道歸真定築道觀賜名
玉華諭將士舉兵攻宋詔曰朕即位之後深以戢兵為
念故年前遣使於宋以通和好宋人不務遠圖伺我小
隙反啓邊釁東剽西掠曾無寧日朕今春還宮諸大臣
皆以舉兵南伐為請朕重以兩國生靈之故猶待信使
還歸庶有悛心以成和議留而不至者今又半載矣往
來之禮遽絕侵擾之暴不已彼嘗以衣冠禮樂之國自

居理當如是乎曲直之分灼然可見今遣王道貞往諭卿等當整爾士卒礪而戈矛矯爾弓矢約會諸將秋高馬肥水陸分道而進以為問罪之舉尚賴宗廟社稷之靈其克有勲卿等當宣布朕心明諭將士各當自勉毋替朕命鄂州青山磯許黃洲所招新民遷至江北者設官領之勅懷孟牧地聽民耕墾八月壬辰賜故金補闕李大節諡貞肅丁酉命開平守臣釋奠于宣聖廟戊戌以燕京路宣撫賽音諤德齊為平章政事勅以賀天爵

為金齒等國安撫使庫琳拜副之仍招諭使安其民已
亥諭武衛軍都指揮使李伯祐汰本軍疲老者選精銳
代之給海青銀符一有奏馳驛以聞辛丑以宣撫使鈕
祜祿納罕為中書右丞庫庫為左丞賈文備為開元女
直碩達勒達等處宣撫使賜虎符以宋降將王青為總
管教武衛軍習射乙巳禁以俘掠婦女為娼丙午太白
犯歲星以許衡為國子祭酒丁未以姚樞為大司農竇
默仍翰林侍講學士先是以樞為太子太師衡為太子

太傅默為太子太保樞等以不敢當師傳禮皆辭不拜
故有是命初立勸農司以陳邃崔斌成仲寬鈕祐祿從
中為濱棣平陽濟南河間勸農使李士勉陳天錫陳膺
武孟古岱為邢洺河南東平涿州勸農使已酉命大名
等路宣撫使歲給翰林侍講學士竇默太醫副使王安
仁衣糧賜田以為永業甲寅賞董文炳所將渡江及北
征有功者二十二人銀各五十兩封順天等路萬戶張
柔為安肅公濟南路萬戶張榮為濟南公陝西四川行

省乞就決邊方重刑不允詔陝西四川行省存恤歸附
軍民詔自今使臣有矯稱上命者有司不得聽受諸王
后妃公主駙馬非聞奏不許擅取官物賜慶壽寺海雲
寺陸地五百頃勅西京運糧于沙井北京運糧于魚兒
泊立檀州驛頒斗斛權衡賑桓州饑民賜諸王塔齊爾
金千兩銀五千兩幣三百匹給阿實罕甲價銀千二百
兩核實新增戶口措置諸路轉輸法命劉整招懷夔府
嘉定等處民戶宋私商七十五人入宿州議置于法詔

宥之還其貨聽權場貿易仍檄宋邊將還北人之留南
者九月庚申朔詔以呼塔噶宅為中書省署奉遷祖宗
神主于聖安寺癸亥邢州安撫使張耕告老詔以其子
鵬翼代之武衛親軍都指揮使李伯祐董文炳言武衛
軍疲老者乞補換仍存恤其家從之丙寅以鈕祜祿納
罕行中興府中書省戊辰大司農姚樞請以儒人楊庸
教孔顏孟三氏子孫東平府詳議官王鏞兼充禮樂提
舉詔以庸為教授以鏞特兼太常少卿辛未以清滄鹽

課銀賞往歲所貸民錢給公費者置和糴所于開平以
戶部郎中宋紹祖為提舉和糴官丙子諭諸王駙馬凡
民間詞訟毋得私自斷決皆聽朝廷處置河南民王四
妻靳氏一產三男命有司量給贍養勅今歲田租輸沿
河近倉官為轉漕不可勞民癸未以甘肅等處新罹兵
革農民安業者為戍兵所擾遣阿實克焦端義往撫治
之以海青銀符二金符十給中書省量軍國事情緩急
付乘驛者佩之以開元路隸北京宣撫司真定路官民

所貸官錢貧不能償詔免之王鶚請於各路選委博學
老儒一人提舉本路學校特詔立諸路提舉學校官以
王萬慶敬鉉等三十人充之勅燕京順天等路續製人
甲五千馬甲及鐵裝具各二千冬十月庚寅朔詔鳳翔
府種田戶隸平陽兵籍毋令出征務耕屯以給軍餉辛
卯陝西四川行省上言軍務急速若待奏報恐失事機
詔與都元帥稱埒會議行之遣道士訾洞春代祀東海
廣德王廟壬辰敕和爾齊諾海率所部畧地淮西丁酉

敕阿巴等及陝西路宣撫司檢覈博囉罕阿勒達爾所
貸官銀庚子以右丞張啓元行中書省於平陽太原等
路括西京兩路官民有壯馬皆從軍令宣德州楊庭訓
統之有力者自備甲杖無力者官與供給兩路鄂囉官
并在家軍人凡有馬者並付新軍劉總管統領昂吉所
管西夏軍并豐州蓐麻林夏水阿嚙罕皆備鞍馬甲仗
及博囉罕所管兵凡徒行者市馬給之並令從軍違者
以失悞軍期論修燕京舊城命平章政事趙璧左三部


尚書克呼木率蒙古漢軍駐燕京近郊太行一帶東至平灤西控關陝應有險阻於附近民內選諳武事者修立堡寨守禦以河南屯田萬戶史權為江漢大都督依舊戍守又選銳卒三千付史樞管領於燕京近郊屯駐壬寅命亳州張柔歸德邸浹睢州王文幹水軍解成張榮寶東平嚴忠嗣濟南張宏七萬戶以所部兵來會罷東平會計前任官侵用財賦甲辰宋兵攻瀘州劉整擊敗之詔賞整銀五千兩幣帛二千匹錫爾丹劉元振守

禦有功各賞銀五百兩將士銀萬兩幣帛千匹乙巳詔
指揮副使鄭江將千人赴開平指揮使董文炳率善射
者千人由魚兒泊赴行在指揮使李伯祐率餘兵屯潮
河川壬子詔和木哈奇爾岱等自得勝口至中都預備
糧餉芻粟丙辰詔平章政事塔齊爾率軍士萬人由古
北口西便道赴行在所十一月壬戌大兵與額呼布格
遇於實默圖諾爾之地諸王哈坦等斬其將哈坦和爾
齊及其兵三千人塔齊爾與哈必齊等復分兵奮擊大

破之追北五十餘里帝親率諸軍以躡其後其部將阿
陶等降額呼布格北遁庚午太陰犯昴壬申詔免今年
賦稅癸酉駐蹕特默哈喇之地以尚書克呼木平章趙
璧兼大都督率諸軍從塔齊爾北上分蒙古軍為二克
呼木從穆蘇出居庸口駐宣德德興府諾海從阿固岱
出古北口駐興州帝親將諸萬戶漢軍及武衛軍由檀
順州駐潮河川敕官給芻糧毋擾居民罷十路宣撫司
止存開元路命諸路市馬二萬五千餘匹授蒙古軍之

無馬者丁丑徵諸路宣撫司官赴中都移蹕於蘇默哈達地詔漢軍屯懷來晉山鷹坊阿里沙及阿薩爾兄弟二人以擅離扈從伏誅十二月庚寅詔封皇子珍戩為燕王領中書省事辛卯熒惑犯房壬辰熒惑犯鉤鈴癸巳以昌撫哈里泊等處薦罹兵革免今歲租賦甲午師還詔撤所在戍兵放民間新簽軍命太常少卿王鏞教習大樂壬寅以隆冬命諸王哈必濟所部軍士無行帳者聽舍民居命陝蜀行中書省給綏德州等處屯田牛

種農具初立宮殿府秩正四品專職營繕立尚食局尚藥局初設控鶴五百四人以劉德為軍使領之立異樣局達魯噶齊掌御用織造秩正三品給銀印賜諸王金銀幣帛如歲例是歲天下戶一百四十一萬八千四百九十有九斷死罪四十六人



元史卷四

元史卷四考證

命大將伊克及巴圖爾追之 巴圖爾原文作拔突兒

他卷又作拔都兒又作霸突兒八都兒今併改

中統元年遣特穆爾李舜欽等行部 特穆爾原文作

帖穆兒各卷有作某某帖木兒某某鐵穆爾某某帖

陸耳者今併改

蒙古岱 原文作忙古帶他卷又作忙兀帶忙古斛忙

古歹蒙古斛今併改

鄂爾和達 原文作兀魯忽帶他卷又作忽魯帶又作
元魯兀台今併改

哲伯特穆爾 原文作只必帖木兒他卷又作制必帖
木兒執畢帖木兒今併改

二年高麗國王倬更名植 原文作植據高麗傳改後
倣此

遇于實默圖諾爾之地 實默圖原文作昔木土他卷
又作失木土昔門禿失木禿又作石木溫都今併改

欽定四庫全書

史部
元史卷五至
七

御史_臣徐如澍覆勘

總校官編修_臣朱鈐

欽定四庫全書

元史卷五

明翰林學士亞中大夫知制誥兼修國史宋濂等修

本紀第五

世祖二

三年春正月癸亥修宣聖廟成庚午罷高麗互市諸王
塔齊爾請置鐵冶從之請立互市不從呼魯古爾所部
民饑罷上供羊命銀冶戶七百河南屯田戶百四十賦

稅輸之州縣命匠戶為軍者仍為軍其軍官當考第富
貧存恤無力者耶律鑄詣北京餉諸王軍仍遣宣撫使
柴禎等增價糴米三萬石益之賜高麗國歷辛未禁諸
道戍兵及勢家縱畜牧犯桑棗禾稼者癸酉以軍興人
民勞苦勅停公私逋負毋徵癸未賜廣寧王卓多駝鈕
金鍍銀印及諸王哈必齊行軍印宋制置使賈似道以
書誘總管張元等李璫獲其書上之丙戌命江漢大都
督史權亳州萬戶張弘彥將兵八千赴燕備宮懸鐘磬

樂舞籥翟凡用三百六十二人高麗遣使奉表來謝優
詔荅之李璫質子彥簡逃歸二月丁亥朔元籍軍竄名
為民者命有司還正之括諸道逃亡軍已丑李璫反以
漣海三城獻於宋盡殺蒙古戍軍引麾下趨益都前宣
撫副使王磐脫身走至濟南驛召磐令姚樞問計磐對
豎子狂妄即成擒耳帝然之庚寅宋兵攻新蔡辛卯始
定中外官俸命大司農姚樞講定條格甲午李璫入益
都發府庫犒其將校乙未詔諸道以今歲民賦市馬丙

中郭守敬造寶山漏成徙至燕京以興松雲三州隸上都辛丑李璫遣騎寇蒲臺癸卯詔發兵討之以趙璧為平章政事修深冀南宮棗強四城甲辰發諸蒙古漢軍討李璫命水軍萬戶解成張榮實大名萬戶王文幹及萬戶嚴忠範會東平濟南萬戶張宏歸德萬戶邱浹武衛軍礮手元帥薛軍勝等會濱棣詔濟南路軍民萬戶張宏濱棣路安撫使韓世安各修城塹盡發管內民為兵以備召張柔及其子弘範率兵二千詣京師丙午命

諸王哈必齊總督諸軍以布扎爾額布根及趙璧行中書省事於山東宋子貞叅議行中書省事董源高逸民為左右司郎中許便宜從事真定順天河間平灤大名邢州河南諸路兵皆會濟南以中書左丞庫庫尚書克呼木宣撫游顯行宣慰司於大名洺磁懷孟彰德衛輝河南東西兩路皆隸焉己酉王文統坐與李璫同謀伏誅仍詔諭中外王演等以妖言誅辛亥勅元帥阿哈分兵戍平灣海口及東京廣寧懿州以餘兵詣京師詔諸

道括逃軍還屯田嚴其禁壬子李璫據濟南癸丑詔大名召磁彰德衛輝懷孟河南真定邢州順天河間平灤諸路皆籍兵守城宋兵攻滕州丙辰詔巴圖摩多將息州戍兵詣濟南移其民於蔡州東平萬戶嚴忠範留兵戍宿州及蘄縣以餘兵自隨三月戊午詔非中書省文移及兵民官申省者毋許入遞已未括穆蘇愛滿輝和爾伊嚕勒昆達實密等戶丁為兵庚申括北京鷹坊等戶丁為兵蠲其賦令趙炳將之辛酉準巴圖言河南有

自願從軍者即令將之遣鄭鼎沙木斯鼎達哩岱索多
行宣慰司事于平陽太原簽見任民官及捕鷹坊人匠
等軍徙弘州錦江繡女于京師勅河東兩路元括金州
兵付鄭鼎將之以平章政事瑪穆特廉希憲叅政商挺
斷事官穆蘇行中書省於陝西四川獲私商南界者四
十餘人命釋之勅燕京至濟南置海青驛凡八所壬申
命戶部尚書劉肅專職鈔法平章政事賽音諤德齊兼
領之以薩奇蘇柴禎行宣慰司事於北京免今歲絲銀

止輸田租癸酉命史樞阿珠各將兵赴濟南遇李璫軍
擊破之斬首四千璫退保濟南乙亥宋將夏貴攻苻離
戊寅萬戶韓世安率鎮撫馬興千戶張濟民大破李璫
兵於高苑獲其權府傅珪賜濟民興金符詔以李璫兵
敗諭諸路禁民間私藏軍器壬午以輝和爾字書給驛
璽書免西京今年絲銀稅甲申免高麗酒課乙酉宋夏
貴攻蘄縣諭諸路管民官毋令軍馬使臣入州城村居
鎮市擾及良民夏四月丙戌朔大軍樹柵鑿塹圍璫於

濟南丁亥詔博興高苑等處軍民嘗為李璫脅從者並
釋其罪庚寅命克呼木安撫張耕分邢州戶隸兩達爾
罕辛卯修河中禹廟賜名建極宮壬辰以大梁府渠州
路軍民總帥蒲元圭為東夔路經略使丙申宋華路分
湯太尉攻徐邳二州詔分張柔軍千人還戍亳州庚子
江漢大都督史權以趙百戶挈衆逃歸斬之詔自今部
曲犯重罪鞠問得實必先奏聞然後寘諸法詔安輯徐
邳民禁征戍軍士及勢官毋縱畜牧傷其禾稼桑棗以

米千石牛三百給西京蒙古戶癸卯宋兵攻亳州甲辰
命行中書省宣慰使諸路達魯噶齊管民官勸誘百姓
開墾田土種植桑棗不得擅興不急之役妨奪農時乙
巳以北京廣寧豪懿州軍興勞弊免今歲稅賦命諸路
詳讞冤獄詔河東兩路并平陽太原路達魯噶齊及兵
民官撫安軍民各安生業毋失歲計丁未李璫遣柴牛
免招諭部民廬廣縛以獻殺之以廣權威州軍判兼
捕盜官戊申賜諸王額森克金印庚戌賜諸王哈必齊

金銀海青符各二免松山興州望雲縣新舊差賦以望
雲松山興州課程隸開平府壬子勅非軍情毋行望雲
驛乙卯河南路王豁子張無僧杜信等謀為不軌並伏
誅詔右丞相史天澤專征諸將皆受節度五月戊午蘄
縣陷權萬戶李義千戶張好古死之庚申築環城圍濟
南壇不復得出詔薩奇蘇安撫益都路百姓各務農功
仍禁蒙古漢軍剽掠癸亥史權妄奏徐邳總管李誥格
完復邳州城詔由誥格以下並原其罪時宋將夏貴攻

邳州誥格出降貴既去誥格自陳能保全州城史權以聞故有是命甲子宋兵攻利津縣蠲濱棣今歲田租之半東平蠲十之三自燕至開平立牛驛給鈔市車牛戊辰以左丞相和爾布哈兼中書省都斷事官賜虎符真定順天邢州蝗以平章政事賽音諤德齊兼領工部及諸路工作以孟烈所獻蹶張弩藏於中都丙子晉山至望雲立海青驛丁丑李誥格等伏誅命史天澤選考徐邳總管甲申真定路巴雅爾哈雅殺造偽鈔者三人讓

其違制之罪西京宣德咸寧龍門霜天順平陽河南真
定兩電東平濱棣早詔覈實逃戶輸納絲銀稅租戶口
增者賞之隱匿者罪之逃民苟免差稅重加之罪大司
農姚樞辭赴省議事帝勉留之命樞與左三部尚書劉
肅依前商議中書省事六月乙酉朔宋兵攻滄州雅州
瀘山民既降復叛命誅其首亂者七人餘令安業割遼
河以東隸開元路戊子濱棣安撫使韓世安敗宋兵于
濱州丁河口己丑遣塔齊爾帥兵擊宋軍仍安諭瀕海

軍民乙未禁女直侵軼高麗國民其使臣往還官為護
送命博索府屯田軍移駐鴨綠江之西以防海道丙申
高麗國王王植遣使來貢壬寅陝西行省言西京宣德
太原匠軍困乏乞以民代之有旨軍籍已定不宜動搖
宜令貧富相資果甚貧者令休息一歲癸卯太原總管
李毅努克達嚕噶齊戴齊蘇等領李璫偽檄傳行旁郡
事覺誅之勅武寧軍歲輸所產鐵河西民及諸王和斯
濟勒所部軍乏食給鈔賑之壬子申嚴軍官及兵伍擾

民之禁癸丑立小峪蘆子寧武軍赤泥泉鐵冶四所東
平嚴忠濟向為民貸錢輸賦四十三萬七千四百定借
用課程鈔本鹽課銀萬五千餘兩詔勿徵秋七月戊午
復蒙古軍站戶差賦農民色銀徵其半停戶止令輸絲
民常輸賦之月毋徵私債勅私市金銀應支錢物止以
鈔為准丙寅賜夔州路行省楊大淵金符十銀符十九
賞麾下將士別給海青符二事有急速馳以上聞立槍
杆嶺驛以便轉輸癸酉甘州饑給銀以賑之甲戌李璫

窮蹙投大明湖水中不即死獲之併蒙古軍囊嘉特伏誅體解以徇戊寅以夔府行省劉整行中書省於成都潼川兩路仍賜銀萬兩分給軍士之失業者八月己丑郭守敬請開玉泉水以通漕運廣濟河渠司王允中請開邢洺等處漳滏澧河達泉以溉民田並從之甲午博多歡等奏請以宣德州德興府等處銀冶付其匠戶歲取銀及石綠丹粉輸官從之丙午立諸路醫學教授戊申勅王鶚集廷臣商榷史事鶚等乞以先朝事蹟錄付

史館河間平灤廣寧西京宣德北京隕霜害稼九月戊
午亳州萬戶張弘略破宋兵於蘄縣復宿蘄二城以待
衛親軍都指揮使董文炳兼山東路經略使收集益都
舊軍充武衛軍戍南邊詔益都行省大都督薩奇蘇與
董文炳會議兵民籍每十戶惟取其二充武衛軍其海
州東海漣水移入益都者亦隸本衛已未罷霸州海青
驛安南國陳光昺遣使貢方物壬戌改邳州為順德府
立安撫司治磁威三州隸馬聽太原民食小鹽歲輸銀

七千五百兩己巳以摩和納餉軍有功授禮部尚書賜
金符壬申授安南國王陳光晒及達嚕噶齊納喇丹虎
符勅濟南官吏凡軍民公私逋負權閣毋徵癸酉都元
帥庫庫岱卒於軍以其兄阿珠代之授虎符將南邊蒙
古漢軍閏月甲申朔沙肅二州乏食給米鈔賑之丁亥
立古北口驛己丑濟南民饑免其賦稅免諸路軍戶他
徭庚寅勅京師順州至開平置六驛辛卯嚴忠範奏請
補東平路廟學太常樂工從之勅武衛軍及黑軍會於

京師庚子中翼千戶玖珠破宋兵于虎腦山庚戌發粟三十萬賑濟南饑民冬十月丙辰放金州所屯軍士二千人及大明河南新簽防城軍為民庚申分益都軍民為二董文炳領軍薩奇蘇治民禁諸王使臣師旅敢有恃勢擾民者所在執以聞詔以李壇所掠民馬還其主以郝經劉人傑使宋未還廩其家中書省奏與宋互市庶止私商及復逋民之陷于宋者且覘連海二州不允以劉人傑不附李壇擢益都路總管仍以金帛賜之

戊授益都行中書省都督府所統州郡官金符十七銀符十一乙丑詔禁京畿畋獵丙寅分東西兩川都元帥府為二以托迪及劉整等為都元帥及左右副都元帥詔責高麗欺慢之罪又詔賜高麗王植歷以戰功賞渠州達嚕噶齊王章等金五十兩銀一千五百五十兩賞閻蓬等路都元帥合州戰功銀五千兩丁卯詔鳳翔府屯田軍隸兵籍仍屯田鳳翔放刁國器所簽平陽軍九百一十五人為民閻蓬廣安順慶夔府等路都元帥奇

徹戍青居山請益兵詔陝西行省及鞏昌總帥汪惟正
以兵益之戊辰楊大淵乞於利州大安軍以鹽易軍糧
從之庚午勅鞏昌總帥汪惟正將戍青居軍還屯田利
州乙亥分中書左右部丁丑勅宿州百戶王達等所擒
宋王用夏珍等八人赴京師命伯嘉努所將質子軍入
侍戍寅命布魯魯所統固安平灤質子軍自益都徙還
故地詔益都府路官吏軍民為李璫脅從者並赦其罪
勅萬戶嚴忠範修復宿州蘄縣萬戶呼圖克輝圖何總

管修完邳州城郭十一月乙酉太白犯鉤鈴丁亥勅聖
安寺作佛頂金輪會長春宮設金籙周天醮辛丑日有
背氣重暈三珥勅濟南人民為李壇裨校掠取財物者
詣都督薩奇蘇所訟之真定民郝興讐殺馬忠忠子榮
受興銀令興代其軍役中書省以榮納賂忘讐無人子
之道杖之沒其銀事聞詔論如法有司失出之罪俾中
書省議之三義沽竈戶經宋兵焚掠免今年租賦汰少
府監工匠存其良者千二百戶遣官審理陝西重刑勅

河西民徙居應州其不能自贍者百六十戶給牛具及粟麥種仍賜布人二匹乙巳詔都元帥阿珠分兵三千人同額森布哈輝圖兵馬復立宿州蘄縣邳州有旨諭史天澤朕或乘怒欲有所誅殺卿等宜遲留一二日覆奏行之丙午詔特徵人員宜令乘傳戊申陞撫州為隆興府以實喇諤都為總管割宣德之懷安天成及威寧高原隸馬十二月甲寅封皇子珍戢為燕王守中書令丙辰勅諸王塔齊爾等所部獵戶止收包銀其絲稅輸

之有司立河南山東統軍司以塔爾琿和爾齊為河南
路統軍使廬昇副之東距亳州西至均州諸萬戶隸馬
察克布哈為山東路統軍使武秀副之西自宿州東至
寧海諸萬戶隸馬罷各路急遞鋪丁已立十路宣慰司
以真定路達魯噶齊趙璠等為之已未犯罪應死者五
十三人詔重加詳讞辛酉詔給懷州新民耕牛二百俾
種水田立諸路轉運司以燕京路監權官曹澤等為之
使癸亥享太廟詔各路總管兼萬戶者止理民事軍政

勿預其州縣官兼千戶百戶者仍其舊己丑復立息州城以安其民召真定順德等路宣慰使王磐乘傳赴京師丙寅申嚴屠殺牛馬之禁己巳詔諸路管民總管子第有分管州府司縣及鷹坊人匠諸色事務者罷之壬申遣使收輯諸路軍民官海青牌及驛券戊寅詔諸路管民官理民事管軍官掌兵戎各有所司不相統攝作佛事於昊天寺七晝夜賜銀萬五千兩割北京興州隸開平府建行宮於隆興路陞太原臨泉縣為臨州降寧

陵為下縣仍隸歸德賜諸王金銀幣帛如歲例是歲天下戶一百四十七萬六千一百四十六斷死罪六十六人

四年春正月乙酉禁蒙古軍馬擾民宋賈似道遣楊琳齋空名告身及蠟書金幣誘大獲山楊大淵南歸大淵部將執琳詔誅之以宋和爾穆爾及沙洋回回鷹坊等兵戍商州藍田諸隘軍民官各從統軍司及宣慰司選舉岳天輔乞復立息州不允丙戌以姚樞為中書左丞

改諸路監榷課稅所為轉運司甲午給公主巴古符印
其所屬設達嚕噶齊給鈔賑益都路貧民之無牛者立
十路鄂囉總管丁酉益都路行省大都督薩奇蘇上李
璫所傷漣水軍民及陷宋蒙古女直特默齊軍數男女
凡七千九百二十二人癸卯領部阿哈瑪特請興河南
鐵冶及設東平等路巡禁私鹽軍從之召商挺趙良弼
赴闕乙巳勅李平陽以所部西川出征軍士戍青居山
其各翼軍在青居山者悉還成都詔陝西行省塔喇

海等收恤離散軍戶詔以諸路漢軍鄂囉母隸各萬戶
管領其科徵差稅山東河南隸統軍司東西兩川隸征
東元帥府陝西隸行戶部凡鄂囉官內有各萬戶弟男
及私人皆罷之勅總帥汪忠臣都元帥托迪及劉整等
益兵付都元帥奇徹戍青居山仍以解州鹽課給軍糧
丙午詔諸翼萬戶簡精兵四千充武衛軍罷古北口新
置驛增萬戶府監戰一員叅議一員以瑪哈穆特所俘
濟南老僧口之民文面為奴者付元籍為民汪忠臣史

權械宋謀者六人至京師有旨釋之辛亥申禁民家兵器及蒙古軍擾民者陵州達嚕噶齊莽格戰死濟南以其子孟古岱襲職召雲頂山侍郎張威赴闕二月壬子朔命河東宣慰司市馬百二十九匹賜諸王巴拉軍士之無馬者甲寅詔諸路官員子弟入質以高麗不答詔書詰其使者以民杜了翁先朝舊功復其家庚申賞萬戶齊喇所部將士討李璫有功者銀二千七百五十兩甲子車駕幸開平以王德素充國信使劉公諒副之使

于宋致書宋主詰其稽留郝經之故詔諸路置局造軍器私造者處死民間所有不輸官者與私造同三月戊子沂州胡節使范同知陷于宋命存恤其家或言其嘗為宋兵嚮導乃分其妻孥資產賜有功將士辛卯勅薩奇蘇招集益都逃民命董文炳以所獲宋諜及俘八十一人赴隆興府聽諸路獵戶及捕盜巡鹽者執弓矢壬辰遣扎瑪里鼎和糴東京己亥諸路包銀以鈔輸納其絲料入本色非產絲之地亦聽以鈔輸入凡當差戶包

銀鈔四兩每十戶輸絲十四斤漏籍老幼鈔三兩絲一
斤庚子伊克德勒岱請修瓊華島不從壬寅關東蒙古
漢軍官未經訓勅者令各乘傳赴開平癸卯初建太廟
乙巳賜德沁諾延等銀七千九十兩命北京元帥阿哈
發漢軍二千人赴開平己酉高麗國王王植遣其臣朱
英亮入貢上表謝恩復立宿州夏四月庚戌朔以漏籍
戶一萬一千八百附籍戶四千三百於各處起治歲課
鐵四百八十萬七千斤癸丑選益都兵千人充武衛軍

甲寅償河西阿實克賑所部貧民銀三千七百兩己未以完顏端田宅賜益都千戶傳國忠國忠父天祐為端所殺故命以其田宅賜之宣德至開平置驛罷開元路宣慰司丙寅西京武州隕霜殺稼戊寅召竇默許衡乘驛赴開平諸王阿濟格所部貧民遠徙者賜以馬牛車幣以東平為軍行蹂踐賑給之改滄清深鹽提領所為轉運司王鶚請延訪太祖事蹟付史館五月癸未詔北京運米五千石赴開平其車牛之費並從官給乙酉初

立樞密院以皇子燕王守中書令兼判樞密院事戊子
陞開平府為上都其達嚕噶齊烏勒希為上都路達嚕
噶齊總管董銓為上都路總管兼開平府尹辛卯詔立
燕京平準庫以均平物價通利鈔法乙未勅商州民就
戍本州毋禁弓矢丙申立上都馬步驛丁酉以元帥楊
大淵張大悅復神山有功降詔獎諭戊戌詔以禮部尚
書摩和納兼領潁州光化互市及領已括戶三千興煽
鐵冶歲輸鐵一百三萬七千斤就鑄農器二十萬事易

粟四萬石輸官河南隨處城邑市鐵之家令仍舊鼓鑄
庚子河南路總管劉克興矯制括戶罷其職籍家資之
半陞上都路望雲縣為雲州松山縣為松州賞前討瑛
塔噶戰功薩里圖庫庫楚等鈔二千一百七十四錠幣
帛一千四百二十疋六月壬子河間益都燕京真定東
平諸路蝗乙卯以管民官兼統懷孟等軍阿薩爾戰歿
汴梁授其子孟古岱萬戶佩金符戊午賜錫津田戶六
百己未賜高麗國王王植羊五百癸酉賜巴古公主所

部鈔千錠立上都惠民藥局建帝堯廟於平陽仍賜田
十五頃以錫津為中書右丞相塔齊爾為中書左丞相
秋七月癸未詔諸投下毋擅勾攝燕京路州縣官吏已
酉禁野狐嶺行營民毋入南北口縱畜牧損蹂桑稼給
公主巴古銀五萬兩哈喇哈納銀千兩己未以故東平
權萬戶呂義死王事賜謚貞節戊戌詔弛河南沿邊軍
器之禁陞燕京屬縣安次為東安州固安為固安州河
南統軍司言屯田民為保甲丁壯射生軍凡三千四百

人分戍沿邊州郡乞蠲他徭從之庚子詔賜諸王卓多牛馬價銀六萬三千一百兩壬寅詔禁益都路特默齊擾民以成都經略司隸西川行院禁蒙古漢軍諸人煎販私鹽詔山東經略司徒膠萊莒密之民及竈戶居內地中書省臣以妨煮鹽為言遂令統軍司完復邊戍居民竈戶毋徙詔阿珠戒蒙古軍不得以民田為牧地燕京河間開平隆興四路屬縣雨雹害稼八月戊申朔詔和木哈總管諸路驛佩金符辛亥置元帥府于大理詔

東平大名河南宣慰司市馬千五百五十匹給阿珠等
軍陞宣德州為宣德府隸上都以淄萊登三州為總管
府治淄州命錫勒希總制鬼國大理兩府兵部郎中劉
芳前使大理至吐蕃遇害命恤其家壬子命中書省給
北京西京轉運司車牛價鈔彰德路及洺磁二州旱免
彰德今歲田租之半洺磁十之六冀州蒙古百戶阿實
克等犯鹽禁沒入馬百二十餘匹以給軍士無馬者甲
寅命成都路運米萬石餉潼川給鈔付劉整市牛屯田

分劉元禮等軍戍潼川命阿敦將之丙辰詔以成都路
綿州隸潼川戊午以阿陶商挺行樞密院於成都凡成
都順慶潼川都元帥府並聽節制庚申以史天倪前為
武僊所殺以武僊第賜其子楫癸亥勅京兆路給賜劉
整第一區田二十頃以茂巴爾所部貧乏賜銀七千五
百兩給之甲子以西涼經兵居民困弊給鈔賑之仍免
租賦三年勅諸臣傳旨有疑者須覆奏丙寅以諸王哲
伯特穆爾部民困乏賜銀二萬兩給之壬申復置急遞

鋪濱棣二州蝗真定路旱詔西涼流民復業者復其家
三年車駕至自上都九月壬午河南大名兩路宣慰司
所獲宋諜王立張達刁俊等十八人遇赦釋免給衣服
遣還乙酉立漕運河渠司己丑賜諸王阿濟格所部種
食牛具庚寅諭高麗上京等處毋重科歛民招諭濟南
濱棣流民遣使徵諸路賦稅錢帛民間所賣布帛有疎
薄狹短者禁之冬十月戊午初置隆興路驛十一月甲
申詔以歲不登量減阿蘇奇味各軍行餉東平大名等

路早量減今歲田租丙戌享於太廟以哈坦塔齊爾王
磐張文謙行事高麗國王王植以免置驛籍民等事遣
其臣韓就奉表來謝賜中統五年歷并蜀錦一仍命植
入朝立御衣尚食二局十二月丁未朔以鳳翔屯軍汪
惟正青居等軍刀國器平陽軍令益都元帥奇徹統之
成虎嘯寨甲戌勅駙馬阿爾布哈蒲萄戶依民例輸賦
伊嚕勒昆達實密僧道種田入租貿易輸稅丙子賜諸王
金銀幣帛如歲例是歲天下戶一百五十七萬九千

一百一十賦絲七十萬六千四百一斤鈔四萬九千四百八十七錠斷死罪七人

至元元年春正月丁丑朔高麗國王王植遣使奉表來賀壬午勅諸路宣慰司非奉旨無輒入覲以千戶張好古歿王事命其弟好義好禮並襲職為千戶癸巳以益都武衛軍千人屯田燕京官給牛具以鄧州保甲軍二千三百二十九戶隸統軍司戊戌楊大淵進花羅紅邊絹各百五十段優詔諭之己亥立諸路平準庫癸卯命

諸王位下工匠已籍為民者並徵差賦儒釋道伊嚕勒
昆達實密等戶舊免租稅今並徵之其蒙古漢軍站戶
所輸租減半西北諸王率部民來歸勅北京西京宣慰
司隆興總管府和糴以備糧餉築冷水河城命千戶托
歡等戍之罷南邊互市申嚴持軍器販馬越境私商之
禁二月辛亥賀福等六人告平陽太原漏籍戶詔賞以
官廷臣以非材對給鈔與之勅選儒士編修國史譯寫
經書起館舍給俸以贍之壬子修瓊華島發北京都元

帥阿哈所領軍疏雙塔漕渠甲寅以故亳州千戶郎閏
陷於宋命其子榮祖襲職丙辰罷陝西行戶部丁卯太
陰犯南斗癸酉車駕幸上都詔諸路總管史權等二十
三人赴上都大朝會弛邊城軍器之禁三月庚辰設周
天醮於長春宮己亥命尚書宋子貞陳時事子貞條具
以聞詔獎諭命中書省議行之辛丑詔四川行院命阿
陶專掌軍政其刑名錢穀商挺任之立漕運司以王光
益為使夏四月戊申以彰德治磁路引漳滏水灌田

致御河淺澀鹽運不通塞分渠以復水勢辛亥太陰犯
軒轅御女星壬子東平太原平陽旱分遣四僧祈雨乙
卯詔高麗國王王植來朝上都修世見之禮辛酉以四
川茶鹽商酒竹課充軍糧楊大淵以部將王仲得宋將
咎萬壽書殺之詔以其事未經鞫問或墮宋人行間之
計豈宜輒施刑戮詰責大淵仍存恤仲家御苑官囊嘉
特請修駐蹕涼樓并廣牧地詔涼樓俟農隙牧地分給
農之無田者丁卯追治李璫逆黨萬戶張邦直兄弟及

姜郁李在等二十七人罪戊辰給新附戍軍糧餉高麗
國王王植遣其臣金祿來貢五月乙亥遣蘇爾托音郭
守敬行視西夏河渠俾具圖來上庚辰勅劍州守將分
軍守劍門置驛於人頭山丙戌太陰犯房丁亥釋宋私
商五十七人給糧遣歸其國己丑以平陰縣尹馬欽發
私粟六百石贍饑民又給民粟種四百餘石詔獎諭特
賜西錦五端以旌其義乙未初置四川急遞鋪丙申賜
諸王奇徹銀萬兩濟所部貧戶己亥太陰犯昴以中書

右丞鈕祜祿納罕為平章政事邛部川六番安撫招討使都王明亞為鄰國建都所殺勅其子伯佗襲職賜金符六月乙巳召王鶚姚樞赴上都宋制置夏貴率兵欲攻虎嘯山勅以萬戶舒穆魯紇扎拉兩軍益奇徹戍之戊申高麗國王王植來朝秋七月甲戌彗星出輿鬼昏見西北貫上台掃紫微文昌及北斗旦見東北凡四十餘日以阿哈瑪特言益解州鹽課均賦諸色僧道軍匠等戶其太原小鹽聽民便癸未改新鳳州為徽州以西

番十八族部立安西州行安撫司事丁亥諸王算濟所
部營帳軍民被火發粟賑之庚寅給諸王伊蘇布哈印
壬辰特詔諭鞏昌路總帥汪惟正勞勉之賜元寶交鈔
三萬貫仍戍青居賜諸王裕隆哈寶印仍以先朝獵戶
賜之丁酉龍門禹廟成命侍臣阿哈托音代祀己亥定
用御寶制凡宣命一品二品用玉三品至五品用金其
文曰皇帝行寶者即位時所鑄惟用之詔誥別鑄宣命
金寶行之庚子額呼布格自實默圖之敗不復能軍至

是與諸王裕隆哈實阿實達錫里濟其所謀臣布拉噶
呼察圖們阿爾察托果斯等來歸詔諸王皆太祖之裔
並釋不問其謀臣布拉噶等皆伏誅八月壬寅朔陝西
行省臣上言川蜀戍兵軍需請令鄂囉官徵入官庫移
文於近戍官司依數取之宋新附民宜撥地土衣糧給
其牛種仍禁邊將分匿人口商州險要乞增戍兵陝西
獵戶移獵商州河西鳳翔屯田軍遷戍興元四川各翼
軍有地者徵其稅給無田者糧皆從之甲辰詔秦蜀行

省發銀二十五萬兩給沿邊歲用乙巳立諸路行中書省以中書左丞相耶律鑄叅知政事張惠等行省事詔新立條格省併州縣定官吏員數分品從官職給俸祿頒公田計月日以考殿最均賦役招流移禁勿擅用官物勿以官物進獻勿借易官錢勿擅科差役凡軍馬不得停泊村坊詞訟不得隔越陳訴恤鰥寡勸農桑驗雨澤平物價具盜賊囚徒起數月申省部又頒陝西四川西夏中興北京三處行中書條格定立諸王使臣驛傳

稅賦差發不許擅招民戶不得以銀與非投下人為諤
都禁口傳勅旨及追呼省臣官屬詔蒙古戶種田有馬
牛羊之家其糧住支無田者仍給之庚戌命燕王署勅
諸王設僚屬及說書官諸站戶限田四頃免稅供驛馬
及祇應命各路總管府兼領其事癸丑命僧子聰同議
樞密院事詔子聰復其姓劉氏易名秉忠拜太保叅領
中書省事乙卯詔改燕京為中都其大興府仍舊增都
省叅佐掾史月俸丙辰劉秉忠王鶚張文謙商挺言燕

王既署相銜宜於省中別置幕位每月一再至判署朝
政其說書官皇子明安以李磐為之諾木罕以高道為
之丁巳以改元大赦天下詔曰應天者惟以至誠極民
者莫如實惠朕以菲德獲承慶基內難未戢外兵未戢
夫豈一日于今五年賴天地之畀矜暨祖宗之垂裕凡
我同氣會於上都雖此日之小康敢朕心之少肆比者
星芒示儆雨澤愆常皆闕政之所繇顧斯民之何罪宜
布惟新之令溥施在宥之仁據布拉噶呼察圖們阿爾

察托果斯輩構禍已照依太祖皇帝扎薩克正典刑訖
可大赦天下改中統五年為至元元年於戲否往泰來
迓續亨嘉之會鼎新革故正資輔弼之良咨爾臣民體
予至意戊午給益都武衛軍千人冬衣己未鳳翔府龍
泉寺僧超過等謀亂遇赦沒其財羈管京兆僧司同謀
蘇德令從軍自効發萬戶舒穆魯紕扎拉所部千人赴
商州屯田亳州軍六百八人及河南府軍六十人助奇
徹戍青居勅山東經略副使武秀選益都新軍千人充

武衛軍赴中都城郊以沂州監戰塔斯萬戶孟義所部
兵戍之太原路總管伊埒孟古岱坐藏甲匿戶罷職為
民九月壬申朔立翰林國史院以改元詔諭高麗并赦
其境內辛巳車駕至自上都庚寅益都毛璋謀逆二子
及其黨崔成並伏誅籍其家貲賜行省薩奇蘇冬十月
壬寅朔高麗國王王植來朝乙巳禁上都畿內捕獵庚
戌有事於太廟壬子恩州厯亭縣進嘉禾一莖五穗戊
辰改武衛軍為侍衛親軍十一月丙子詔宋人歸順及

北人陷沒來歸者皆月給糧食辛巳征古桂先是濟喇敏內附言其國東有古桂伊里裕兩部歲來侵疆故往征之己丑以至元二年歷賜高麗國王王植禁登州和州等處并女真人入高麗界剽掠辛卯召衛州太一五代度師李居素赴闕壬辰罷領中書左右部併入中書省以領中書省左右部兼諸路都轉運使知太府監事阿哈瑪特為平章政事領中書省左右部兼諸路都轉運使阿里為中書右丞丁酉太原路臨州進嘉禾二莖

以元帥阿敦劉整劉元禮奇徹等將士獲功賞賚有差
十二月乙巳罷各投下達魯噶齊定中外百官儀從丁
未勅遣宋諜者四人還其國戊午賞巴圖軍人銀五十
萬兩甲子太陰犯房乙丑以王鑑昔使大理沒於王事
其子天赦不能自存優恤之丁卯勅鄧州沿邊增立茱
萸常平建陵季陽四堡戊辰命選善水者一人沿黃河
計水程達東勝可通漕運馳驛以聞庚午詔罷樞密院
斷事官及各路鄂囉官令總管府兼總押所始罷諸侯

世守立遷轉法是歲真定順天洺磁順德大名東平曹
濮州泰安高唐濟州博州德州濟南濱棣淄萊河間大
水賜諸王金銀幣帛如歲例戶一百五十八萬八千一
百九十五斷死罪七十三人

元史卷五

元史卷五考證

三年以興松雲三州隸上都 按四年紀云五月庚子
陞上都路望雲縣為雲州松山縣為松州又地理志
亦云望雲縣中統四年陞為雲州則是時尚未有雲
州之名此云興松雲三州牽連誤書也至松山陞州
地理志亦以為中統三年事與紀不合未知孰是
免松州興州望雲縣新舊差賦 縣原文譌州今改正
說見前

左丞相和爾布哈

左原文謚右據宰相表改

濱棣安撫使韓世安

原文謚安世據上文改

改邢州為順德府立安撫司治磁威三州隸焉 按地

理志至元元年以洺州磁州屬順德府與紀不合

建行宮于隆興路

原文謚興隆據地理志改

四年開平府為工都

地理志作五年考中統紀元止

有四年明年即改元至元係志誤

命阿敦將之

原文作按敦他卷又作按東今併改

至元元年賜諸王玉隆哈實印 按諸王表玉隆哈實

於三年始賜印與紀不合

錫里濟 原文作昔里給他卷又作昔里吉失列吉又

訛作失吉列今併改

